

INUIT ATAQATIGIIT

Inatsisartuni



04. juli 2019

UKA2019/045

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalackersuisut attartornermut inatsisissatut siunnersuutissaminni pisortat inissiatileqatigiiffiisa attartunngortussanut inissiamik neqeroornerminni inissiaq neqeroorutertik ukiut tallimat kingullit iluanni oqummik ajornartorsiuteqartoq paasineqarsimagaangat nalunaartalernissaannik pisussaaffiliinissaat pillugu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Sofia Geisler, Inuit Ataqatigiit)

Tungavilersuut:

Naalackersuisut Aggusti 2018-imi §37 naapertorlugu apeqqummut 2018-191-mut akissumminni uppersarparaat, inissiatileqatigiiffiit pisortanit namminersortunilluunniit pigineqartut, attartortunut nutaanut inissiami iserterfigisami oqummik (qanittukkut) ajornartorsiuteqarfiusimanerannik ilisimatitsissuteqarnissaminnik pisussaaffeqanngitsut.

Tamatuma saniatigut Naalackersuisut §37 naapertorlugu apeqquteqaammut 2018-328-mut akissumminni uppersarparaat, inissiatileqatigiiffiup pisortanit pigineqartup inissiat oqummik ajornartorsiuteqarfiusimasut immikkut nalunaarsorneq ajorai.

Taamaappat imaassimassaaq, attartortunik inissianut pisortanit pigineqartunut oqummik ajornartorsiorfiusunut, imaluunniit siusinnerusukkut oqoqarsimasunut kingusinnerusukkut takkuteqqittumut nuuttoqartartoq.

Isumaqarpunga inatsisit atuuttut, inuit ataasiakkaat ilaqutariilluunniit peqqissusaat illersorniarlugit, oqummik ajornartorsiorartoqartillugu iliuseqartariaqalersarneq eqqarsaatigalugu, naammaginangitsut. Pisortat inissiamut nuuttoqartinnagu paasissutissanik pisarialinnik tunniussinissartik qulakkeertariaqarpaat.

Inatsit naapertorlugu, inuit ataasiakkaat ilaqutariillumi, angerlarsimaffimmi peqqinnangitsumik silaannalimmi najugaqarnertik pissutigalugu,

peqqiillioraluttuinnarsinnaapput ajornerpaaffianilu peqqissutsimikkut innarlerneqarsinnaallutik.

Isumaqarpunga inatsit atuuttoq, matumani Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq, nalunaarutillu tassunga attuumassutillit ilanngullugit, innuttaasut ataasiakkaat pisinnaatitaaffiinik illersuinngitsoq.

Tamanna pissutigalugu siunnersuutigaara, attartortarneq pillugu inatsisissatut siunnersuummi nutaami Naalackersuisut saqqummiunnialersaagaanni, pisortat inissiatileqatigiiffii attartortussat, ukiuni kingullerni tallimani inissiap oqoqarsimaneranik ajornartorsiortoqarsimappat, ilisimatinneqartarnissaannik pisussaaffilerneqassasut.

Inissiat ullutsinnut naapertuuttut pisariaqartippavut. Inuit ataasiakkaat ilaqutariillu peqqissusaat salliutittariaqarparput. Inatsiseqartariaqarpugut innutaasut inissianut peqqissutsimut innarliisinnaasunut illersorneqarnissaannik qulakkeerinnittumik.

Pisortat inissiatileqatigiiffianni inissiat oqummik ajornartorsiorfiusimasut immikkut nalunaarsorneqartannginnerat pissutigalugu, inissianik attartortut nooreernerminni oqummik ajornartorsiulerataannaapput. Taamaattoqartillugu inatsisit naapertorlugit nammagittaalliorsinnaaneq atuutilissaaq, innersuussutigissavaralu inissiatileqatigiiffinni pisortanit pigineqartuni oqommik ajornartorsiutit annikkaluarpata annertugaluarpataluunniit, tamaasa ilumoorullugit pisassagaat.

Aningaasatigut allaffissornikkullu pisortanut kingunissai:

Ilimagisariaqassaaq siunnersuusionerq annerpaamik AC-fuldmægtigitut atorfillip ukiup affaani sulineranik naleqassasoq, tassa 250.000 kr.-it. Siunnersuulli manna inatsisip pineqartup pilersaarutigineqareersutut naleqqussarneqarnissaannik suliamut ilanngunneqassammat, naatsorsuutigineqarsinnaavoq aningaasartuutissat taaneqartuniit malunnaatilimmik annikinnerussasut.

Tamatuma saniatigut pisortat inissiaataanni oqummik nassarfiusimasunut nalunaarsuiffimmik pilersitsineq ingerlatsinerlu aningaasartorfiusaaq. Suliassaq tamanna pisortat inissiatileqatigiiffiini ataasiakkaani akisussaaffigineqassaaq.

Aningaasatigut allaffissornikkullu namminersortunut kingunissai:

Soqanngilaq.

Aningaatigut allaffissornikkullu innuttaasunut kingunissai:

Siunnersuut innuttaasup inissiaq neqeroorutigineqartoq pillugu annertunerusumik ilisimatinneqartalernissamik psinnaatitaaffeqalernissaannik kinguneqassaaq.